



ALLGEMAINI MOBYYLMACHIG

ALTI STAINLEMER FASNACHT 2017



SCHISS- DRÄGGZÜUGLI

BASLER, AN D WAFFE, GOPFRIIDSTUTZ!

Kai Schugger garantiert me Schutz.
Dy Sicherhait, dasch unser Zyy!,
stand mit yy, mir mache mobyy!

BÜRGER, MIR MIEN YS JETZT WEERE,

will sich s Bööse duet vermeere.
D Schwyzer Armee, die hett kai Biss –
Drum hänn mir ganz gwalstig Schiss.

D GFOOR LUURT ÜBERALL UND IMMER.

Jo, es wird die ganz Zyt schlimmer.
Was so hörsch, das duet ys gruuse.
Am liebschte gosch nümmi uuse.

AM E KONZÄRT, DÖRT WAISCH SCHLICHT NIT,

nimmt doo aine e Knarre mit?
Drum lueg y, wenn y yyne gang,
wo isch äggscht doo dr Nootussgang?

AU FERIE AME SCHÖÖNE STRAND,

sinn gföörlig, das isch jo bekannt.

Liigsch im Stuel in dyner Raie,
wird dy glyy ain aabemaie.

E WEEKEND IN ERE TOLLE STADT,

isch in dääne Zytte nimm so glatt.
Ebb in Istanbul, Berlin, Paris –
Terrorischte machen ys das myys.

BIM FLANIERE BRUCHTS DÖRT GANZ VYYL MUET.

Y root dir aa: Blyyb uf dr Huet!
Nimm dy in Acht vor jedem Laschter,
sunscht gitts scho bald e neu
Desaschter.

KONTROLLE GITTS JO ZWOOR NID Z GNABB,

glyych root ych dir vom Fliegen ab.
Denn wenn das aine wirglic wott,
sprängt är dy Fluugi au zue Schrott.

WENN DE MIT EM ZUG WOTSCH RAISE,

hesch e zimmlig groossi Maise.
Es wird dir aine, nid ganz bache,
mit em Beili dr Gaarus mache.

DIE SZENE KÖMMEN ALS WIE NÖÖCHER,

und d Chance wärde immer hööcher,
ass bi uns öbbis bassiere duet.
Kai Wunder verliersch jetz doo dr Muet.

SICHERHAIT MUESS FÜR YS SOFORT ENTSTOO.

Zem Noochrichtegsetz do gitts e «Jo».
Daateschutz? Isch doch uns so lang wie
brait,
Fiche sinn scho lang Vergangehait.

ZUM SCHUTZ DIE BESCHTI VARIANTE,
vom Binggis bis zer alte Dante,
schynt immer no e Waffekauf.
Das gitt em Schiggsaal dr «grächt
Verlauf».

LUEG MOL DIE NEU STATISTIGG AA:
E Waffe bruuchsch als Schwyzer Maa!
Zem Aigeschutz – das muesch begryffe,
duet me hütt zue de Waffe gryffe.

**UND WENNS NOONEM ARMEECHEF
GOOT,**
denn bsorget euch e Nootvorroot.
Sottschnüt em Zuefall überloo,
dr Krieg könnt vor dr Düüre stoo!

**IN DE MEDIE WIRD S FÜURLI
GSCHÜÜRT,**
ass me d Angscht denn förmlic spüürt.
Alli sinn verdächtich, hänn e Tigg,
wirfsch uf jeede e misstrauisch Bligg.

SITZ Y NÄB EME MAA MIT BART,
isch s Risiko, wenn ych z lang wart,
ass es mir grad nümmi längt,
und dää nid nur dr Raame sprängt.

**WAS ISCH MIT DÄÄRE VERHÜLLTE
DOO?**
Die will sicher ins Nirwana goo!
Drum mach y mi doch mit Verlaub,
am beschte ganz glyy uss em Staub.

**BI SO GEDANGGE WIRD YS
GSCHMUUCH.**
Mir hänn e komisch Gfüül im Buuch.
So goosch nümm sorglos
und ganz glasse,
mit dr Drummle bi uns uf d Gasse.

**ISCH AIN VO DÄÄNE SPINNER SO
DEBYYL**
und nimmt sich d Fasnacht als sy Zyy!
E Bombe bi uns uff dr Gass?
Das fänd sicher e jeede krass!

**ALS WAGGIS TARNT E BÖMBLI
ZINDE,**
Sprängstoff under s Goschdym binde.
E Gweer verstegett in dr Posuune?
Das verdirbt die gueti Luune.

**LEGT AIN E SPRÄNGSATZ IN E
WAAGE,**
jä, dä Typ, dä mien mir jaage!
Bim Ystoo griegsch ains uff e Latz,
so wird d Fasnacht zem
Kriegsschaublatz.

**MIR SPIILE JETZT DIE LETSCHTI
KARTE,**
mache mobyy!, dien sofort starte.
Es isch nid luschtig, aber woor,
dangg uns isch dr Cortège nid in
Gfoor.

**SO BIETE MIR MIT UNSRER
TRUBBE,**
Schutz für die glaini
Fasnachtsgrubbe.
Dr Bungger goot zue bi jeder Waarnig,
isch sicher und gitt e gueti Taarnig.

**MIR HÄN JETZT ZWOOR NÜMM VYL Z
LACHE,**
könne aber sicher Fasnacht mache.
Und die findet esoo – isch das no glatt? –
Abschirmt wie im Réduit statt.

D Laddärne-Uusstellig uff em Minscherplatz und d Waage- und Reggwisye-Uusstellig bi dr Kasärne sin vom Määntig znacht bis am Mittwuch demoorge! Am Fritig und Samschtig, 10. und 11. März isch Noochwuggswärbig vo dr 1. Lektion im Zält uff em Barfi.

Soll Dy Bueb mee als nur Fasnacht mache könne, kumm dräggt am 11. oder 12. März vo 2 bis 4 an Schnubberapéro in unsere Käller am Aubärg 2b oder informier dy unter: www.jungli-stainlemer.ch.